

## Z A P I S N I K

Sa 3-će redovne sjednice Skupštine Bosansko-podrinjskog kantona Goražde, održane 24. februara 2011. godine u sali Skupštine Bosansko-podrinjskog kantona Goražde, sa početkom u 10:00 sati.

Sjednici Skupštine Bosansko-podrinjskog kantona Goražde prisustvuje 24 poslanika, i to: Frašto Emir, Mujković Dževida, Adžem Dževad, Došlo Suad, Imamović Demir, Kožo Mersudin, Nemeć-Klisura Vesna, Kurtović Mustafa, Halilović Adis, Agović Adis, Urući Nazif, Mulahmetović Alma, Borović Mensud, Žuga Damir, Turčalo Mehmed, Brdar Kasim, Popović Sevda, Gušo Sabina, Marić Osman, Omanović Muamer, Fejzić Edim, Mujagić Rasim, Čurović Redžo i Kulović Ahmet.

Izostanak sa sjednice najavila je poslanica Milović Daliborka.

Pored poslanika Skupštine Bosansko-podrinjskog kantona Goražde sjednici prisustvuju: sekretar Skupštine Bosansko-podrinjskog kantona Goražde Bašić Midhat, sekretar Vlade Bosansko-podrinjskog kantona Goražde Sijerčić Emir, kandidati za ministre u Vladi Bosansko-podrinjskog kantona Goražde: Pleh Muhidin, Sipović Nusret, Delizaimović Alma, Janković Radmila, Klovo Delila, Semiz Božidar, poslanica u Zastupničkom domu Federacije Bosne i Hercegovine Vehabović Belkisa, predstavnik Ministarstva za urbanizam, prostorno uređenje i zaštitu okoline Šunja Ahmet, načelnik Općine Pale-Prača Zec Asim, načelnik Općine Foča-Ustikolina Kunovac Zijad, načelnik Opštine Novo Goražde Nešković Dalibor, predsjedavajući Općinskog vijeća Općine Goražde Kanlić Kenan, predsjednica Kantonalnog suda Goražde Kuljuh Semija, Muftija goraždanski Hamed ef. Efendić, kantonalni pravobranilac Delahmet Mensur, zamjenik Kantonalnog pravobranioaca Halilović Alija, Općinski pravobranioac Hrelja Enisa, direktori osnovnih i srednjih škola sa područja Bosansko-podrinjskog kantona Goražde, direktor Zavoda zdravstvenog osiguranja BPK-a Goražde Pleh Ferid, direktor Zavoda za javno zdravstvo Čengić Nedim, direktor Kantonalne bolnice Goražde Jahić Fadil, direktorica J.U. Služba za zapošljavanje Goražde Hodo Nafija, direktor J.U. Dom za stara i iznemogla lica Goražde Kuljuh Kemal, predstavnica J.P. „Bosansko-podrinjske šume“ Goražde Obuća Aida, direktorica J.P. RTV Goražde Čohodar Jasmina, predsjednik Kantonalnog saveza samostalnih sindikata BPK-a Goražde Fejzić Adem, predsjednik Skupštine opštine Foča Šukalo Lutvo, predsjednik Skupštine opštine Rogatica Čamdžija Kemal, komesar Uprave policije MUP-a BPK-a Goražde Hurić Ešef, predstavnik EUPM-a Pejić Dragan, predstavnici Njemačkog LOT tima, predstavnica OSCE-a, te predstavnici sredstava javnog informisanja.

Skupštinom Bosansko-podrinjskog kantona Goražde predsjedava predsjedavajući Skupštine Bosansko-podrinjskog kantona Goražde Urući Nazif, a zapisnik vodi Burhan Safeta.

Predsjedavajući Skupštine Bosansko-podrinjskog kantona Goražde pozdravio je građane Bosansko-podrinjskog kantona Goražde koji putem radija i televizije prate prenos Skupštine Bosansko-podrinjskog kantona Goražde i sve prisutne u sali Skupštine.

**Urući Nazif** – predsjedavajući Skupštine

Zbog ranije preuzetih obaveza izostanak na sjednicu Skupštine najavili su: predsjednik Općinskog suda Goražde, komandant bataljona Oružanih snaga u kasarni Kosova, predsjednici opština Višegrad i Pale i zaželjeli uspješan rad ove sjednice.

/Nakon utvrđenog kvoruma intonirana je Himna/

**Urući Nazif** – predsjedavajući Skupštine

Za današnju 3-ću redovnu sjednicu Skupštine Bosansko-podrinjskog kantona Goražde predlažem slijedeći:

## Dnevni red

1/ Prijedlog Odluke o potvrđivanju Vlade Bosansko-podrinjskog kantona Goražde.

Otvaram raspravu po predloženom dnevnom redu.

Pošto se niko ne javlja za riječ, zaključujem raspravu i pozivam poslanike da se za predloženi dnevni red izjasnimo dizanjem ruke.

Ko je za, molim, da digne ruku? /24 poslanika/

Ima li neko protiv? /Niko/

Da li se neko uzdržao od glasanja? /Niko/

Konstatujem da je dnevni red usvojen, jednoglasno, sa 24 glasa „za“.

### Tačka 1.-

Prelazimo na 1-vu tačku dnevnog reda: Prijedlog Odluke o potvrđivanju Vlade Bosansko-podrinjskog kantona Goražde.

Uruči Nazif – predsjedavajući Skupštine

Pozivam predsjednika Komisije za izbor i imenovanja Skupštine Bosansko-podrinjskog kantona Goražde da iznese stav Komisije po Prijedlogu Odluke o potvrđivanju Vlade Bosansko-podrinjskog kantona Goražde.

Brdar Kasim – predsjednik Komisije za izbor i imenovanja

Komisija za izbor i imenovanja Skupštine Bosansko-podrinjskog kantona Goražde na sjednici održanoj 17. februara 2011. godine razmatrala je Odluku o imenovanju kandidata za premijera Bosansko-podrinjskog kantona Goražde i prijedlog kandidata za Premijera Bosansko-podrinjskog kantona Goražde prim. dr. Frašto Emira za imenovanje Vlade Bosansko-podrinjskog kantona Goražde, pa nakon provedene diskusije, a na osnovu člana 33., 47., 194. i 195. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, Skupštini Bosansko-podrinjskog kantona Goražde:

## P R E D L A Ž E

Da Skupština Bosansko-podrinjskog kantona Goražde donese Odluku o potvrđivanju Vlade Bosansko-podrinjskog kantona Goražde.

Komisija za izbor i imenovanja Skupštine Bosansko-podrinjskog kantona Goražde utvrdila je Prijedlog Odluke:

Na osnovu člana 33. stav 4. Ustava Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 8/98, 10/00 i 5/03/ i članova 106., 108. i 196. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, Skupština Bosansko-podrinjskog kantona Goražde, na sjednici održanoj \_\_\_\_\_ 2011. godine, **d o n o s i:**

## **O D L U K U**

### **O POTVRDJIVANJU VLADE BOSANSKO-PODRINJSKOG KANTONA GORAŽDE**

#### **Član 1.**

Skupština Bosansko-podrinjskog kantona Goražde potvrđuje Vladu Bosansko-podrinjskog kantona Goražde u slijedećem sastavu:

1. EMIR FRAŠTO – Premijer Kantona,
2. DEMIR IMAMOVIĆ – ministar za privredu,
3. DELILA KLOVO – ministar za socijalnu politiku, zdravstvo, raseljena lica i izbjeglice,
4. DŽEVAD ADŽEM – ministar za boračka pitanja,
5. BOŽIDAR SEMIZ – ministar za urbanizam, prostorno uređenje i zaštitu okoline,
6. MUHIDIN PLEH – ministar za finansije
7. NUSRET SIPOVIĆ – ministar za unutrašnje poslove,
8. ALMA DELIZAIMOVIĆ – ministar za obrazovanje, nauku, kulturu i sport,
9. RADMILA JANKOVIĆ – ministar za pravosuđe, upravu i radne odnose.

#### **Član 2.**

Vlada Bosansko-podrinjskog kantona Goražde preuzima dužnost danom potvrđivanja.

#### **Član 3.**

Ova Odluka stupa na snagu danom donošenja, a naknadno će se objaviti u „Službenim novinama Bosansko-podrinjskog kantona Goražde“. Stupanjem na snagu ove Odluke prestaje da važi Odluka broj: 01-05-1006/10 od 23. decembra 2010. godine.

Broj: 01 – 05 – \_\_\_\_/11  
\_\_\_\_. februara 2011. godine  
G o r a ž d e

**PREDSJEDAVAJUĆI SKUPŠTINE**

Uruči Nazif

### **O B R A Z L O Ž E N J E**

Socijaldemokratska partija Bosne i Hercegovine – Kantonalni odbor Goražde predsjedavajućem Skupštine Bosansko-podrinjskog kantona Goražde 9. februara 2011. godine predložio je kandidata za Premijera Bosansko-podrinjskog kantona Goražde prim. dr. Frašto Emira.

Predsjedavajući Skupštine Bosansko-podrinjskog kantona Goražde 9. februara donio je Odluku o imenovanju kandidata za Premijera Bosansko-podrinjskog kantona Goražde prim. dr. Frašto Emira.

Kandidat za premijera Bosansko-podrinjskog kantona Goražde 16. februara 2011. godine predsjedavajućem Skupštine Bosansko-podrinjskog kantona Goražde dostavio je prijedlog za ministre u Vladi BPK-a Goražde, a predsjedavajući Skupštine je istog dana prijedlog prosljedio Komisiji za izbor i imenovanja Skupštine Bosansko-podrinjskog kantona Goražde.

Uvidom u svu pristiglu dokumentaciju, Komisija za izbor i imenovanja Skupštine Bosansko-podrinjskog kantona Goražde je utvrdila da je ispoštovana kompletna procedura za imenovanje Vlade Bosansko-podrinjskog kantona Goražde.

**Uruči Nazif** – predsjedavajući Skupštine

Otvaram raspravu po Prijedlogu Odluke o potvrđivanju Vlade Bosansko-podrinjskog kantona Goražde.

U diskusiji po Prijedlogu Odluke o potvrđivanju Vlade Bosansko-podrinjskog kantona Goražde učestvovali su: Brdar Kasim, Mujagić Rasim i Popović Sevda.

**Uruči Nazif** – predsjedavajući Skupštine

Pošto se niko više ne javlja za riječ, zaključujem raspravu i pozivam poslanike da se izjasnimo dizanjem ruke.

Ko je za, molim, da digne ruku? /17 poslanika/

Ima li neko protiv? /4 poslanika/

Da li se neko uzdržao od glasanja? /3 poslanika/

Konstatujem da je Skupština Bosansko-podrinjskog kantona Goraže sa 17 glasova „za, 4 „protiv“ i 3 „uzdržana“ glasa donijela Odluku o potvrđivanju Vlade Bosansko-podrinjskog kantona Goražde.

/Premijer g-din Frašto Emir i ministri u Vladi BPK-a Goraže: Pleh Muhidin, Sipović Nusret, Delizaimović Alma, Janković Radmila, Semiz Božidar, Klovo Delila, Imamović Demir i Adžem Dževad dali su svečanu izjavu/.

**Uruči Nazif** – predsjedavajući Skupštine

Uputio je čestitke premijeru i ministrima u Vladi Bosansko-podrinjskog kantona Goražde i pozvao premijera g-dina Frašto Emira da podnese kratski ekspozé.

**Frašto Emir** – premijer Bosansko-podrinjskog kantona Goražde

Gospodine predsjedavajući, g-djo dopredsjedavajuća, sekretaru Skupštine Bosansko-podrinjskog kantona Goražde, radnici na podršci u radu Skupštine, gospodo poslanici i g-dje i g-djice poslanice, vjerski dostojanstvenici, poslanice u Federaciji Bosne i Hercegovine, gosti, direktori kantonalnih organa uprave, uprava, sudova, tužilaštva, pravobranilaštva, načelnici i predsjedavajući općinskih vijeća Goražde, Pale-Prača, Foča-Ustikolina, naše komšije koji prvi put prisustvuju inauguraciji, načelnici opština i predsjedavajući skupština i opštinskih vijeća: Rogatica, Foča i Novo Goražde, predstavnici međunarodnih i nevladinih organizacija, građani i gradjanke Bosansko-podrinjskog kantona Goražde, dame i gospodo, u moći koju činimo u ovom vremenu i prostoru gradjanima i gradjankama Bosansko-podrinjskog kantona Goražde hvala!

Do parlamentarne većine smo došli mimo svih političkih pretpostavki, stavova centrala, mišljenja većine glasačkih baza, poštujući glasačko pravo, ističući potrebe funkcionisanja ove ustavne tvorevine „Kanton“. Glasačko pravo i mišljenje glasača su bili vezani u klupku interesa, tim koncima i danas se vješto barata. Reskirajući prije dvije godine, ova dva politička subjekta su pokazala da mogu nositi teret razlika i biti odgovorni. Pokazujemo da sredine kao naša mogu biti putokaz i vizionar dobrog, za što se trudimo ili lošeg, za šta ispaštamo.

Dobro, kom idemo tako sporo, sve je više zakrčeno pojedincima i njihovim interesom da se dobro ogledalo. Postalo ogledno dobro pojedinaca, opšta težnja za dobrim je postala pojedinačna stvar. Ako ovoj Vladi pružite šansu da se opštem posveti, rezultati će biti vidljivi, doprinos svih nas će biti ugrađen u dobro koje gradimo. Budu li okrenuti pojedinačnim zahtjevima, rješavanju dijelova sudbina, danas izabrani će biti potrošeni zalud.

Gubitak svih nas.

Izabrani su opredijeljeni, zdravi zdravo da prepoznaju; nezaposlenim i starim kao i ostalim građanima, pruže šansu iz sporazuma političkih partija. O koalicionom djelovanju na obezbjedjivanju finansijske stabilnosti, kroz usvajanje Zakona o izmjenama i dopunama Zakona o pripadnosti javnih prihoda, angažovanju na infrastrukturnim i razvojnim projektima. Ova uspostavljena koalicija bi odmah trebala da obećanu podršku, projektuje u nacrtu Budžeta, sa povećanim izvornim prihodima, što bi omogućilo da budžetski prihodi obezbijede povećane zahtjeve za izjednačavanje troškova javne uprave, policije, obrazovanja, zdravstva, socijalne zaštite, privrede, poljoprivrede, kulture, sporta, informisanja... Ili do uspostavljanja Zakona o plaćama u organima vlasti, obezbijedi veću finansijsku podršku. Cilj, izjednačiti prava i primanja ovih kategorija sa pravima istih u Sarajevu, Tuzli, Mostaru...

Ili kako reče Djoni – „Nisam bio krupna zvjerka- morao sam ići do kraja“.

Podrška bi se ogledala i u razvoju Kantona, implementacijom razvojnih projekata, predviđenih Programom razvoja Bosansko-podrinjskog kantona do 2014.godine, uredjenjem industrijskih zona, modernizacijom saobraćajne infrastrukture, komunalne infrastrukture, turističke sportsko-rekreativne infrastrukture. Podrška odabranim mjerama povratku, osiguranje proširenja sistema cjeloživotnog školovanja u boljim uslovima, stimulisanjem kvaliteta i kvalitetnih. Radio-televizija Bosansko-podrinjskog kantona bi trebala da u novim prostorijama, sa boljom opremom, prati otvaranje zgrade Centra za socijalni rad, adaptiranog Doma za stara lica i iznemogla lica, da prati niz otvaranja novih radnih mjesta itd.

Sporazum se odnosi i na osiguranje kvalitetnije i u većem obimu zdravstvene zaštite, poštovanjem prava pacijenata implementacijom Evropske povelje, suzbijanjem korupcije u zdravstvu i rješavanjem obaveza, nabavku opreme, kadra. Aktivnosti na jasnom definisanju obaveza, dugovanja, te mogućnosti pozicioniranja kadrova na federalnom nivou.

Budžet će po dogovoru koalicionih partnera biti kreiran da prihodi po osnovu transfera viših nivoa vlasti budu planirani u iznosu koji je dogovoren sa predstavnicima Federacije BiH, i aktivno učestvujemo u ovim predradnjama.

Budžetski rashodi za sve namjene, a posebno troškovi zaposlenih i troškovi materijala budu manji ili ostanu isti sa prošlim Budžetom, dok se povećanja budžetskih rashoda mogu planirati samo za oblasti koje su kao prioritetne definisane u Programu razvoja Bosansko-podrinjskog kantona. Aktivnosti koje su predviđene Programom razvoja biće uvrštene u Budžet, dodjeljivanjem posebne budžetske linije za svaki program, projekat i mjeru.

Prvi prioritetni zadatak vlasti jeste prilagodjavanje organizacijske strukture, ljudskih i finansijskih resursa u organima uprave, zdravstvenom sektoru, obrazovnom sektoru, Ministarstvu unutrašnjih poslova, Radio- televiziji, Domu za stara i iznemogla lica. Aktivnosti na uspostavljanju funkcionalnog javnog sektora će se provoditi prve tri godine mandata. Kvalitetniji odnos prema korisnicima usluga bi bio izražen kroz valorizovanje ocjenjivanja doprinosa u radu, cilj - poboljšanje pružanja javnih usluga.

Drugi prioritetni zadatak je implementacija Programa razvoja Bosansko-podrinjskog kantona Goražde kroz obezbjedjenje neophodne podrške u Skupštini kantona za donošenje novih zakona, ili izmjena zakona za i dopune postojećih zakona, donošenje odluka i zaključaka, u skladu sa odredbama Programa razvoja. Opozicija je opozicija vlasti, na napretku i poboljšanju standarda i života ljudi. Pa je obaveza istaći njihov doprinos.

Treći prioritetni zadatak jeste osiguranje proaktivnog učešća Vlade, ministarstava, organa uprave i javnih ustanova u svim reformama, koje se provode ili će biti pokrenute u BiH i Federacije BiH, u okviru procesa Stabilizacije i pridruživanja Evropskoj uniji. U okviru ovog zadatka, tražit će se podrška Federacije BiH, da omogući da se implementacija projekata u okviru IPA projekata provede i na prostor Bosansko-podrinjskog kantona Goražde. Deklaracija Skupštine će biti osnov interesne obrade predloženih zakona i programa FBiH.

Imenovanjem Vlade, za deset dana bi nacrt Budžeta bio upućen ka Skupštini, sa Programom rada Vlade za 2011. godinu, kao i Programom rada za prvih sto dana. Program razvoja i Akcioni plan će pratiti Budžet. Program rada Vlade, razvoja Kantona, Budžet, Okvirni budžet do 2014, program rada javnih ustanova, zavoda i preduzeća osnovanih od Kantona i usaglašeni sa Programom rada Vlade, do sredine marta 2011. godine.

Djelimično pobrojane, naznačene obaveze o zajedničkom djelovanju iz Sporazuma SDA i SDP – a, javno prezentovani Program razvoja Bosansko- podrinjskog kantona Goražde 2011- 2014, prioriteti Vlade su puka fraziranja, neživotna, nejasna, ako ne kažemo da će građani, bračni par, preko 65 godina bez primanja, imati obezbijedjen minimum novčane naknade i zdravstveno osiguranje; u svakoj porodici će bar jedno raditi, u svakom slučaju, možemo obećati da ćemo sigurno raditi u interesu građana, uz veliki angažman nas koje ste izabrali.

Stvari na kojima ćemo institirati i najviše postići, jeste pouzdanje u sopstvene snage i iznalaženje rješenja u sebi i svojoj okolini.

Zaboravili smo da su rad i radne navike preduslov dobrih rezultata.

U najtežim uslovima smo bili najbogatiji ....

Hvala mojim radnim kolegama u zdravstvu i politici na iskustvu i vještinama, prijateljima i rodbini na čast, mojoj majci na odgoju...., ljudima s kojima sam živio, ženi s kojom živim, starim i mladim, kćerkama, unuci i sinu, ljubavi i sreći kojom me okružuju.

Hvala u ime ministara koji će časno služiti vas, građane Bosansko-podrinjskog kantona.

Sretno nam bilo!

Pošto je dnevni red iscrpljen predsjedavajući Skupštine Bosansko-podrinjskog kantona Goražde zaključio je 3-ću redovnu sjednicu Skupštine u 10:45 sati.

**SEKRETAR SKUPŠTINE**

Bašić Midhat

**PREDSJEDAVALJUĆI SKUPŠTINE**

Uruči Nazif